

virdu sot den Här Clement eppes, wat faktesch falsch ass. En huet sech hei e bësselchen opgereegt an eebe gesot: „Et ass dach schlëmm, datt d'Fonge just 0,1 % bezuelen.“ Abee, op der ganzer Welt bezuele Fonge keng Steieren! Op der ganzer Welt bezuele Fonge keng Steieren an duerfir ass dat eng gelungen Approche fir ze soen: „Zu Lëtzebuerg hutt Der eng Taxe d'abonnement.“ Mir si frou, datt mer déi hunn a mir sinn déi Lescht, déi déi Taxe d'abonnement wëllen erofsetzen oder ofschafen. Ech wollt dat awer just, fir d'Realitéit duerstellen, och nach eng Kéier betounen.

Dann hu mer eng Verméigenssteuer fir Betriber. De Gilles Roth huet de Moie ganz vill driwwer geschwat. Ech wëll net nach eng Kéier an déi Direktioun goen. Och déi Verméigenssteuer fir Betriber gëtt et just nach a fënnf Länner am Moment an der Europäescher Unioun. Och dat muss ee wëssen. An déi fënnf Länner, notamment Frankräich, sinn amgaangen, driwwer nozedenken, ob se se net wëllen ofschafen oder zumindest erofsetzen.

Ech wëll Iech awer direkt soen, datt mir als CSV keng Baisse vun der Gewerbesteuer respektiv vun der Kierperschaftssteuer fir Betriber froen. Mir froen och keng Baisse vun enger Taxe d'abonnement a mir froen och keng Baisse vun der Verméigenssteuer, well mer klipp a kloer soen: Am Moment erlaabt d'Situatioun vun eisen öffentleche Finanzen dat net!

Une voix | Très bien!

M. Laurent Mosar (CSV) | A mir sinn eng verantwortungsbewusst Partei, déi net einfach elo seet: Elo gi mer och nach dohinner an elo gi mer och nach d'Steiere fir d'Betriber erofsetzen. Dat maache mir net!

Mir soen awer gradesou kloer, Madamm Finanzministesch: Mir mussen d'Situatioun am A behalen. Mir musse kucken, wéi déi aner Länner och an der Steuerpolitik virginn, a mir mussen eis trotzdeem d'Recht virbehalen, wann et dann noutwendeg ass, eventuell do nozebesseren. An ech soen och nach direkt: Mir sinn als CSV wierklech net der Meenung, datt mer misste méiglechst niddreg Steiere fir Betriber an Europa hunn. Dat ass net eis Meenung.

Mir soen awer och gradesou kloer: Et kann net sinn, datt d'Steieren hei zu Lëtzebuerg méi héich si wéi an eisem noen Ausland an an deene Länner, mat deene mir an direkter Konkurrenz stinn! An duerfir musse mir dat dote ganz genee am A behalen.

An dann e Punkt – an dat ass deen, deen eis vläicht am meeschte Kappzerbriches mécht, ech hunn et virdu gesot –, dat ass dee vun den Talenter, vun der Main d'oeuvre. Ech soen Iech, datt dat eng richteg Katastroph ass, an ech mengen, e puer Kolleegen hunn dat jo och de Moie gesot. Et gëtt och ëmmer dervu geschwat, datt et ganz schwéier ass, Leit an eist Land ze zéien. Ech soen Iech: A mengem Bekantkrees – an hei setzen och eenzel Kolleegen, déi Kanner hunn – sinn der ëmmer méi, déi net méi hei zu Lëtzebuerg bleiwen, Kanner, déi hei studéiert hunn, Kanner, déi exzellent Diplomer a Kompetenzen hunn, well se soen: „Lëtzebuerg ass net méi attraktiv.“ Dat ass awer einfach eng Realitéit!

Mir kënnen natierlech elo soen, déi géif et net ginn. Mee déi gëtt et! An ech muss Iech soen, dat mécht mir a sech méi Suergen, wéi datt mir net méi Leit vu baussen erakréien, wann eis eege jonk, talentéiert Leit ..., well mir hunn och talentéiert Leit, och ganz vill talentéiert Leit iwwregens aus der Immigration, déi hei an deem Land sinn. Wann déi talentéiert Leit net méi hei wëlle bleiwen an an aner Länner ginn, dann hu mer e Problem, an dorunner musse mer schaffen!

Une voix | Très bien!

M. Laurent Mosar (CSV) | Här President, Dir Dammen an Dir Hären, ech kommen dann zu deene ganz konkrete Propositionen, déi mir als CSV wëlle maachen. An ech fänken do u mat engem Punkt, wou ech e bëssen erstaunt sinn, well en eigentlech néierens oder vu kengem anere Kolleeg hei virgestallt ginn ass. Dat ass a sech d'Modernisatioun vun eisem Steiersystem. Dat ass en extreem wichtege Punkt. Mir hunn am Moment e Steiersystem, deen éischters iwwerhaupt net digitaliséiert ass an och nach e bësselche fonctionéiert – erlaabt mer dat trotzdeem ze soen – wéi am leschte Joerhonnert. An ech mengen, datt do nach ganz vill ze maachen ass.

Dat, wat mir froen, dat ass, datt mer en digitalen Dossier kréien an der Steierverwaltung. Dat ass eppes, wat et schonn a ganz villen auslännesche Steierverwaltungen gëtt. Wat heescht dat, en digitale Steierdossier? Dat heescht en Dossier, wou een à tout moment ka konsultéieren, wéi d'Situatioun vun der Entreprise ass, wat vu Steieren nach ufalen, wat eventuell vu Steieren nach zrëckzekréien ass. Dat ass eppes, wat et am Moment schonn iwwerall a ville Steierverwaltungen gëtt, wat och den Entreprise ganz besonnesch géif hir Aarbecht erliichteren.

Mir froen och, datt den Zënsfouss, deen eis vill ze vill héich schéngt, den Taux d'intérêt légal, de Kolleeg Gilles Roth huet dat schonn e puermol gefrot, endlech och erofgesat gëtt vu 7,2 op d'Hallschent. Mir fannen, datt dat nach largement duergeet, zumindest an den aktuellen Zäiten.

An da froe mir och, datt mer eigentlech erëm méi a Richtung gi vu Kompensatioun vun deem, wat een als Steiere muss bezuelen, an deem, wat een als Steieren zrëckkritt. Dat ass och e Mechanismus, deen ass iwwregens och elo an engem Arrêt vun der Cour administrative confirméiert ginn, datt d'Steierverwaltung vill méi muss a Richtung vu Kompensatioun goen. Dat ass eng modern Steierverwaltung, déi fonctionéiert esou.

An da last but not least, wat d'Steierverwaltung betrëfft, si mir och der Meenung, datt mer hei mussen eng Égalité des armes kréien zwëschent dem Steuerzueler, der Entreprise an der Administratioun. Am Moment ass et esou: Dir hutt just dräi Méint, wou Der kennt eng Reklamatioun maachen. Wann Der déi net gemaach hutt, da sidd Der hors délai.

(M. Fernand Etgen reprend la présidence.)

D'Steierverwaltung huet awer keen Delai, an deem se muss op déi dote Reklamatioun äntweren. An do wiere mir also frou, wann een do géif op e Wee goen, deen och déi Steierverwaltung an d'Aart, wéi se schafft, vill méi modern géif maachen.

Dann en zweete ganz wichtege Punkt fir eis, an dat ass och een, deen haut nach net proposéiert ginn ass. Och eng Moderniséierung vun eisem Steiersystem an deem Sënn, datt d'Pertin, déi Gesellschaften maachen, déi am Moment ëmmer nëmmen an der Zukunft ofgesat kënnen ginn, och an der Vergaangenheet kënnen ofgesat ginn. Dat ass e System, dee schonn a ganz villen Nopeschlänner fonctionéiert, notamment am UK, och an Däitschland fonctionéiert dat. An ech wëll och drop hiweisen, datt dat a sech eng Recommandatioun vun der Europäescher Kommissioun ass, fir op deen dote System ze goen. Dat erlaabt nämlech den Entreprise besonnesch a méi schwierigen Zäiten, iwwer méi Liquiditéiten ze verfüegen.

Eng nächst Proposition, déi mir wëlle maachen an déi fir eis extrèmement wichtege ass, huet mat den Talenter ze dinn. Ech hunn et virdu gesot. Mir hunn am Moment e System vun enger Primm. Dee System

ass net schlecht. Mir hätten allerdéngs gär éischter e System, dee wierklech fokusséiert ass op jonk Leit, déi maximal 40 Joer hunn, jonk Leit, déi natierlech just an de Genoss vun esou enger Primm kéinte kommen an deenen éischte fënnf Joer, wou se dann hei am Land géife schaffen. Dat zielt souwuel fir Lëtzeburger wéi fir Netlëtzeburger. Och dat, mengen ech, ass eng Proposition, déi sécherlech kéint Weesentleches verbessern. Dat ass also och fir eis eng absolutt Prioritéit.

Une voix | Wéi laang?

M. Laurent Mosar (CSV) | Fënnf Joer. Déi éischt fënnf Joer kënnen se dovunner profitéieren. 40 Joer plus während fënnf Joer.

Dann eng ganz wichtege Mesure, do si mir och net déi Eenzeg, déi déi hei scho proposéiert hunn. Dat ass fir déi Entrepreneuren, déi wierklech an nohalteger Technologie, och an Digitalisatioun investéieren, datt déi zousätzlech Ureizer kréien.

Wann ech elo e bësselchen esou héieren, wéi d'Entrepreneuren awer geplot si mat där Transition écologique, wat de Käschtepunkt vun där Transition écologique ass, mengen ech, datt mer do wierklech méi Moyene mussen an d'Hand huelen, an dat solle mer wierklech och maachen iwwer d'Steierpolitik. Dat kënnen mer net nëmme maachen iwwer Subventiounen, mee dat muss, wéi gesot, och iwwer d'Steierpolitik geschéien.

3. Dépôt d'une proposition de loi par M. Laurent Mosar

Exposé

Dann, an dat ass da scho mäi leschte Punkt, an dat ass eigentlech deen, wou de Kolleeg Gilles Roth an ech och ganz frou sinn, datt mer kënnen de Mëtten endlech eis Proposition de loi deposéieren. Hei geet et – an ech hat Iech et jo schonn ugekënnegt – ëm déi sougenannte „Loi Rau reloaded“. Ech géif dem President déi hei iwwerrechen.

8047 – Proposition de loi portant modification de la loi modifiée du 4 décembre 1967 concernant l'impôt sur le revenu aux fins de relancer l'investissement dans l'entrepreneuriat durable et numérique

M. Fernand Etgen, Président | Merci, Här Mosar.

M. Laurent Mosar (CSV), auteur | Ëm wat geet et? Ech mengen, de Moien hat de Kolleeg Änder Bauler dat schonn ugeschnidden, och de François Benoy hat et gesot: Mir constatéieren am Moment, datt mer iwwer zwou Milliarden un zousätzlechen Ekonomien op de Banken hu säit der Covidkris. Déi Ekonomien leien do. Déi ginn net utilliséiert, well d'Leit eigentlech néierens gesinn, wou se dat iergendwéi kënnen investéieren an iergendwéi en Incitatif hunn.

Wann ech kucken, wéi vill Incitativen – an dat ass jo virdu an hei ugeklongen – een huet, wann een an Immobilien investéiert, a wéi weineg een der huet, wann een an d'Économie réelle investéiert, well et ass d'Économie réelle, léif Kolleeginnen a Kolleegen, déi eis virubréngt, net den Immobilien, da muss ech soen, dann ass do wierklech en Decalage, deen net ze akzeptéieren ass!

An duerfir proposéiere mir eigentlech, op eng Success-story zrëckzekommen, d'Loi Rau, déi eeler Kolleeg kënnen sech nach un déi erënneren, datt mir soen: Et muss net nëmme fir d'Entrepreneuren, mee och fir d'Mënschen, déi wëllen investéieren an déi e bëssen Ekonomien hunn ..., datt een déi muss steierlech ënnerstëtzen, wa se an Entrepreneuren investéieren, déi nohalteger an an d'Digitalisatioun investéieren.

Hei geet et – an ech wëll elo net an den Detail goen, dat géif eis ze wäit féieren – a sech ëm d'ESG-Krittäre

plus Digitalisatioun. Mir proposéieren, datt do jiddweree ka bis zu 5.000 Euro par Contribuable ofsetzen, wann en an esou eng Entreprise investéiert. Ech mengen, do maache mer e wichtige Schrëtt Richtung nohalteg Politik. Mir ënnerstëtzen d'Entreprisen, mee mir ënnerstëtzen haaptsächlech d'Bierger, déi emol endlech och nach eng aner Méiglechkeet hunn ze investéieren, déi hinnen e gewëssene Retour gëtt, wéi dat bis elo de Fall ass.

4. Débat d'orientation au sujet de la modernisation et des défis de notre système fiscal (suite)

Débat (suite)

Här President, ech kommen domadder och schonn zum Schluss. Mir hunn also hei souwuel de Moie wéi de Mëtten am Ganzen – hu mer mol gezielt – eng zéng Propositionen, „plus eent“ hu mer dat genannt, dat ass och nach d'Proposition de loi, déi mer souwuel um Terrain vun der individueller Besteuerung wéi och vun der Besteuerung vun de Betriber gemaach hunn.

Et kann ee sécherlech soen: „Déi zéng Propositione sinn net perfekt.“ Ech fannen awer, datt dat e ganz seriösen Denkestouss ass an datt wierklech déi eng oder aner Proposition, déi mer gemaach hunn, och derwärt ass, datt se vun der Regierung a vun der Majoritéit géif ganz seriöös consideréiert ginn.

Ech hat am Ufank gesot: D'Wirtschaft ass kee Selbstzweck, mee muss ëmmer de Mënschen déngen. Mee fir dat kënnen ze maachen, brauche mir, wéi gesot, eng zolidd Wirtschaft mat staarke Betriber, mat staarke Patronen, awer och mat staarke Mataarbechter. Dofir brauche mer e steierlecht Ëmfeld, dat souwuel fir d'Patrone wéi awer och fir déi Dausende vu Mataarbechter stëmmt.

Fir déi zwee gëllt, an de Gilles Roth huet et de Moie gesot: D'Schaffe muss sech lounen – Steierentlaaschung elo! Ech hunn et gesot, mir plädéieren hei net fir iergendwellech Baissé vu Steieren, wat Entreprisé betrëfft. Mir wëllen och hei keng Kaddoen iergendwelleche Patronen vun Entreprisé maachen. Mee mir hätte gär Entreprisen, déi esou opgestallt sinn, datt se hir wichteg Responsabilitéit fir d'Allgemengwesen och kënnen huelen. Dëst ze maachen, ass grad elo d'Verantwortung vun der Politik an et ass och wichtig, datt mer dat maachen, well et ass déi Politik, déi och d'Mënschen dobaussen zesummenhält.

Ech hunn et virdu gesot: Mir sinn als CSV d'Vollekspartei vun der Mëtt. Schaffe muss sech lounen fir d'Mënschen, mee awer och fir d'Betriber. Nëmme esou brénge mir et fäerdeg, weider eng kompetitiv Wirtschaft ze hunn!

Ech soen Iech Merci fir Är Opmierksamkeet.

Plusieurs voix | Très bien!

M. Fernand Etgen, Président | Merci villmools, Här Mosar. An de leschten ageschriwwene Riedner ass den honorablen Här Gilles Baum. Här Baum, Dir hutt d'Wuert.

M. Gilles Baum (DP) | Merci fir d'Wuert, Här President. Wa mer am Tour de France wäeren, da géif gesot ginn: „Hei, elo kënnt d'Voiture-balai nach laanscht.“ Et ass mer awer wichtig, hei e puer Saachen, déi gesot gi sinn, awer och an dat richteg Liicht ze réckelen. An ech rejoinéieren absolutt den honorablen Här Laurent Mosar, wann e seet, dass mer net nëmmen en Niveau haten an deem Debat hei, dee ganz héich war, mee et ass och immens fair erofgaangen, an ech mengen, dat ass och ganz wichtig.

Eng Rei Iddie sinn de Mëtten an de Moien hei vu jiddweregem op den Dësch geluecht ginn, eng Rei Iddien, déi mat Sécherheet d'Iddie vun der Demokratescher Partei rejoinéieren, awer och nach vläicht vun de Koalitionspartner. Ech nenne just d'Grundsteuer, d'Spekulationssteuer, Upassunge beim Amortissement accéléré. An aner Iddien, dat waren eeben där, déi méi parteispezifesch waren. An ech mengen, et ass gutt, dass mer deen Exercice hei gemaach hunn. Et ass gutt, dass jiddweree sech hei konnt expriméieren.

Ech huelen do zum Beispill d'Upassung vun der Stiartabell un d'Inflatioun. Do hu mer eng Berechnung, dass dat 600 Milliounen d'Joer wäeren. Déi Leit aus der Steuerklasse 1a an d'Steuerklasse 2 huelen, do wësse mer, dass dat och 350 Milliounen wäeren.

An dann hu mer eng Rei Mesuren, déi vun enger Rei Riedner genannt gi sinn, wou mer den Déchet fiscal net kennen. Ech huelen do zum Beispill de bëllegen Akt, dee kéint eropgesat gi vun 20.000 op 50.000 Euro; d'TVA Logement vu 50.000 op 100.000 Euro ass hei proposéiert ginn; d'Progressivitéit am Steuersaz; nei Steuertranchen, den Ufank bei 15.000 Euro amplaz bei 12.000; en neie Berechnungsmodus, wann ee Kanner huet; eng ganz Rei Mesuren.

An ech mengen, dat war effektiv flott hei, dass eng ganz Rei Iddien op den Dësch komm sinn. Et sinn eng Rei Iddien ... Dat war jo am Fong och d'Zil, mengen ech, vun dësem Debat, dass jiddweree sech sollt expriméieren, dass jiddweree sech sollt positionéieren. Dat war och gutt esou.

Do sinn Iddien, déi ee soll suivéieren, awer wat nach méi wichtig ass: Et sinn och Iddien, mengen ech, déi mer musse chiffréiere fir ze wëssen, wat all eenzel Mesure do bréngt, wat se kascht an haaptsächlech, mengen ech, wat dat am Steiersäckelche vum Staat bedeit.

Dësen Debat war richtig, et wa mer e klengen Air de précampagne électorale heibanne gespuert hunn, mee ech mengen, domat kann ech ganz gutt liewen, och dat war gutt.

Erlaabt mer ganz kuerz, de Kollege André Bauler ze zitéieren. En huet de Moien dat heite gesot: „Gleeft mer, ech géif léiwer hei stoen an Iech soen: ‚Mir hu Sputt, fir déifgräifend Moosnamen ze huelen. Mir setzen d'Steieren [...] erof a mir entlaaschten [hei a mir entlaaschten do].‘ Mee ech denken, et ass méi wéi kloer [...], datt mir net bereet sinn, d'Nohaltegkeet vun eise Staatsfinanzen, an esou och eisen Triple-A, an enger Welt voller Unsécherheet, Risiken an negativen Iwwerraschungen“, an dat ass leider déi Welt, an där mer de Moment liewen, „liichtfankeg op d'Spill ze setzen. Wann hei zu Lëtzebuerg e manner grouse Kuch gebak géif ginn, da sténgen Aarbechtsplazen [...] um Spill. D'Wirtschaft géif an eng Kris gestierzt ginn an et géif ëmmer manner ze verdeele ginn. Dat géif d'Aarmut féerden an et géif déi Schwächst an der Gesellschaft batter treffen. An dat wëlle mer [net]!“

Jo, mir liewen an onsécheren Zäiten. De Statec huet de Wuesstum vun dësem Joer revidéiert vun 3,5 % op 1,5 %, wann ech richteg informéiert sinn. D'Wuert „Rezessioun“ héiert een an der Eurozon. Hoffentlech bleift dat eng Chimère an dat gëtt keng Realitéit. D'Ewechbrieche vu verschiddene Recetten, do wësse mer och nach net honnertprozenteg, a wat fir eng Richtung dass et geet. An duerfir plädéiere mir als Demokratesch Partei zu dësem Moment ganz kloer fir Wäitsicht a fir Virsicht.

Déi nächst Joren, déi nächst Méint wäerte mer eis müssen der Decken no strecken, ausser, ausser heibanne géif de Wonsch geäussert ginn, fir weider

Scholden ze maachen. Mee dat hunn ech de Mëtten vu kengem vun de Riedner héieren. Duerfir ginn ech dovun aus, dass mer dat Zil, dat mer ëmmer uginn hunn, nämlech ënnert den 30 % vum PIB mat der Verschuldung ze bleiwen, alleguerten zesumme wëllen anhalen.

Plusieurs voix | Très bien!

M. Gilles Baum (DP) | De Spillraum – an ech mengen, dat weess och jiddweree heibannen – ass enk. A mir brauchen an den nächste Méint, an den nächste Jore Loft. Mir brauche finanziell Loft, fir kënnen op Krisen oder op Polykrisen ze reagéieren. Et ass virdu ugeklongen, dass déi Mesuren, déi mer geholl hunn am Kader vum Covid, eis 3,2 Milliarde kascht hunn. Déi éischt Tripartite-Ronn huet 0,9 Milliarde kascht a mir stinn zu 100 % do hannendrun.

Mais on n'est pas sorti de l'auberge! A wann ech Iech géif eppes aneres soen, da misst ech eppes soen, wat ech net ka virausgesinn, well ech mengen, keen heibanne weess, wou mer an dräi oder a sechs Méint stinn oder d'nächst Joer. Et ass vun enger vun de Sensibilité-politiquë gesot ginn, mir hätte bewosst keng grouss Steuerreform gemaach. Mir hätten dat bewosst verschlof.

Ech erënneren drun, dass mer hei eleng 4 Milliarden an de Grapp geholl hu fir Mesuren, déi absolutt néideg waren an där Kris. An ech wëll ënnersträichen, dass mer an de Joren 2018 an 2019 mat de Koalitionspartner vun der LSAP an deene Grénge wierklech amgaange waren, eng ganz Rei Mesuren auszeschaffen. An et si Kollegeen, déi hei op de Bänke setzen, déi waren do derbäi, dat si meng Zeien do derzou. Mir ware wierklech beméit a gewëllt, eppes ze maachen, mee déi Krisen hunn eis e Stréch duerch d'Rechnung gemaach.

Summa summarum: Déi nächst Joren, déi nächst Méint wäerten net einfach sinn. Mir wäerten déi ekonomesch Situatioun, net nëmmen hei zu Lëtzebuerg, mee och an der Eurozon an an der Welt müssen am A behalen. Firwat? Fir eng responsabel Politik ze maachen an de Staatsfinanzen, fir eng nohalteg Politik ze maachen an de Staatsfinanzen, nohalteg fir d'Leit hei zu Lëtzebuerg, nohalteg fir eis Economie a besonnesch nohalteg fir déi kommend Generatiounen.

Ech soen Iech Merci.

Plusieurs voix | Très bien!

M. Fernand Etgen, Président | Merci villmools, Här Baum.

D'Regierung huet d'Wuert, d'Madamm Finanzministesch Yuriko Backes.

Prise de position du Gouvernement

Mme Yuriko Backes, Ministre des Finances | Sou, Här President, Dir Dammen an Dir Hären Deputéiert, d'Diskussioun de Mëtteg, déi de Moien ugefaangen huet, huet mengen ech, erëm eng Kéier gewisen, dass d'Fiskalitéit wierklech ee vun den zentrale politesche Sujeten ass, well d'Fiskalitéit direkten an indirekten Afloss op wierklech all Aspekt vun eise Zesummeliewen an och vun eiser Wirtschaft huet.

Den Debat huet och gewisen, dass d'Fiskalitéit kann en emotionale Sujet sinn. Ech mengen, de Mëtteg war dat hei vläicht e bësse manner de Fall, wéi ech mer dat vläicht hätt kënnen erwaarden. Ech mengen, hei si ganz objektiv a rationell Debate gefouert ginn. An dofir soen ech och Merci, well d'Ennerlag dovunner war den exzellente Rapport vun den zwee Rapportereuren. E ganz grouse Merci dem Här Bauler an dem Här Roth. Ech mengen, dat huet wierklech gehollef, fir dësen Debat ze preparéieren.